

مساحات للذهب مسافات للعشق

سمير عبد الباقي



٥٥٥

مساحات للذهب
مسافات للعشق

شعر |

سمير عبد الباقي

أصوات أدبية

سلسلة

تعنى بنشر الإبداعات المصرية

الهيئة العامة لقصور الثقافة

• تصميم الغلاف : **عمر جهان**

• مساحات للتعب مسافات للعشق ، شعر - الطبعة الأولى - نوفمبر 1997

باسم مدير التحرير على العنوان التالي :
111 ش أمين سامس - القصر العيني
القاهرة - رقم بريدى : 11511

البريد

رئيس مجلس الإدارة

د. مصطفى الرزاز

رئيس التحرير

علي أبوشادي محمد البساطي

المشرف العام على النشر

مدير التحرير

محمد كشيك شحاتة العريان

أمين عام النشر



انكتبت هذه القصائد فى صباحات الشهور الثلاثه
الأولانيه من سنة ٩٧، وحتى نص مارس تمّة
السنين الثمانيه..

وخمسين الأولانيه من عمرى.. مع..
قصيد تانيه لكن ليها عالم تانى.. ما عدا القصيدة
الأخرانيه فهى من قصايد عامنول!!

سمير عبد الباقى

طير مغني عبوز

كل يوم الصبح ح اكتب لك قصيدة
مش أكيد ح تكون جديدة
كل أحزاني وأحزانك.. قديمة..
كل أحلامنا البعيدة
لسه مازالت بعيدة
وعدها ملازمني..
بيلزمني أفضفض عنها وأخذ تاري من نفسي ومنها
أنا ياللى ندرت لك فنى
وإنتى بعيدة عنى، أو عصيه عليه
ملو عينيه أو جمره فى دمي
عشت فرحان بك أغنى..
حتى للزمن اللى خاننى
لليالى اللى مُصرة تفرّ منى

لما بيجنّنى شوق سنّى لصباحاتى الوليدة
وأنا الطير المغنىّ
اللى قصّت ريشه معشوقته الوحيدة
والأمل سرقه وخلف العشق ظنه
عشت اذارى أهات جراحى بحسن ظنّى
وكإن الشعر يا وطنى.. وكإنى
خريشة محموم على جدران ليالىك البليدة

زمن الموت

الزمن الميت في علب السرفيس
المصلوب في محطات الأوتوبيس
التايه حابر داير
بين العتبة الخضرا ورمسيس
المقتول في إشارات السير
المتحنت في أوهام القرن الأربعتاشر
المتحير بين النص وبين التفاسير..
المدلوق في دفاتر تحضير هيئات التدريس..
الزمن المشنوق في الأضابير
المسروق في دوسيهات الأرشيف..
ومسودات مقالات رؤساء التحرير..
المخنوق في دهاeliz الهيئات الحكومية..
واللى يبطالع في الروح.. في شنت التلاميذ

الزمن المحموم بالحرية..
في كشوف فواتير الأمن السريّة..
ماشى بيزحف متلبّش على نار
مستتّى سكاكين القرن الواحد والعشرين..
مسلم أمره لغرف الإنعاش العصرية..
في حوارى العالم الثالث..
لجل يموت - ولأول مرّة -
بطريقة علميّة

حرب أهلية

دقات الحرب الأهلية..
طبول أسطورية بتدمم فى ودانى
بتزغللى لى عينيه
بتشرخ وجدانى..
بتنخ ف وشى من قدر الغول
من جوه شاشات التلفزيون
والتلفون المحمول..
بتتحدانى ف طاسات الزيت المغلى..
الصاحيه من قبل الفجر
يوماتى..
تجهز فى الطعمية..
من أجل ما ينجح بطل السيرك فى ترويض الغول..
....

الحرب الأهليه اليوميه..
شمتانه ف أحزاني..
وهيه قدامي..
بتوزع لحم الشعرا..
قرايين للسوق الحرّة..
وتسوى على نارها الهادية أحلام الفقرا
لجل يلحنها الأمرأ..
فى ساحات الأوهام القومية..
أناشيد وطنيه.. وأغانى..

على قرن النور

الكورة الأرضية..
القلقانه فوق قرن التور بتعد الأيام..
التايهة فى بحر الظلمات..
عشمانه فى ندعة نور..
الأرض الكروية المبليّة..
بهذا المجنون الإنسان..
الطماع..
البيع
الغتت السفاح الطفل
اللمّاح - الفئّان..
داخله على القرن الواحد والعشرين..
شايله على قلبها/ قلبنا
نفس الحكام..

لا فعة فوق كتفها/ كتفنا
كل الجثث المتعفنة من ألف سنة..
نفس الأحلام..
المرّة..
اللى صبحت وبفضل وعدل -
الأقلام الحرّة..
مجرد أوهام..

شيزوفرينيا

كنتوا الصحاب الطيبين - الزوق
شيلتوا هموم (بعض) قد الشوق
وعمر الأرض..
لاسلتوا مرة - مين معاه الحق
ولامين فى ساعة لاختلاف محقوق؟!
هو اكتفى شرك
وكرر خيرُه..
وانت خفيت بين الضلوع شرك..
وكان محال تستحمله من غيرُه..
فرق ما بينكو السوق وتعاثيرة..

هذا انطلق فى العشق على حلّ شَعْره..
بأى شىء حتى بشِعْره يساوم..
ودا اتحرق بالشك فى أمره..
فعوّد القلب على غدر الزمان - بالرّضا..
بأى ندعة خُصرة من أمل قديم
وبأى وهله خوف تخفّف القضا العَشيم
أو أى رعشة شوق
من ذكريات الوُفق والمروق..

...

ليه النهارده يا حزين الرأى والأخلام
قلبك نهج تانى على خطوط سيره..
يا هلترى تعبت حين ضحكت لك الأيام..
والآ الحنين غلبك لحزّ الطوق..
اللى أذلك همّ تفسيره؟!
فعودك تمشى خفيف الخطو..

تَتَبَسَّمُ..

وعلي كتافك حمول

من همَّ ما ينلِّم

زَهَقَتْ وَطِهَقَتْ مِنْهَا حَمِيرُهُ..

تَطْعَنُ فِي قَلْبِكَ

ما تتألَّمُ.. لَطَعَمَ الدَّمُ..!

ولا تَأْمَنُ وتَقْبَلُ لك صديق غيره..!

كومبارسر

لو قُلت إياك تخاف..
ما عادشي باقي وراك.. حطّه ولا غلّة
ولو ما قلتش رعب.. شد الحاف..
واذا ياكل الغل قلبك
دشدش القلّه
يجوز يا عطشان - علّتك ح تفشّ
..
حمار صريح؟
نهق بعلو الصوت
هذا زمان الصراحة اللي في طعم الغشّ
الكذب له ألف راس..

ومناديل الأمان بتكش

....

لو عبقرى؟ تنبل

ما تستفتلش..

العجل عدى النيل ولا اتبلش

مش باقى غيره/ الموت

ما تستعجلش

مين اللى وزك تبيع

اللى ما كنشى يا فتى للبيع.. ماتستسهلش

...

عبيط؟ ح تخجل ليه؟!

رضعت من صدر أمك خيبة الجرايع

احترت بين السجن ع اللقمة..

والسجن برهان لحسن إدارة المشاريع

....

حويط؟. بقيت فيلسوف..

وحكمتك مرجعية.. وكلمتك تشريع

فاحذر.. ولا تكملّش

..

أهبل..؟ تجمّل بالهبل.. واعقل

ما تستهبلش

سوق الخبل شيطنه..

الجدعنه حيثية للفرعنه

احفظ جميل القرش..

الرأسماليه حريه بطبيعة الحال..

والعدل قانون إلهي في اقتصاد السوق

العصمة طول العمر أصلاً

حق راس المال..

إفهم.. ولا تعدّلش..

...

عارف؟

تخلص من حمول الماضي..

كشّر فيوشن شرانم المقاطيع..

فى لحظه.. تكشّ..

...

جاهل..؟ .. وماله..

تعلم أن تكون أنعم -

ح تبقى ألعن ويّا كلّ ربيع

ودوس على اللى ضعيف من أجل يبقى اضعف

الكل أصله قطيع..

وما عدش فيه أحسن ولا أجدع..

إعلنها.. وما تطنّش

كل الفرص لو تخاف منها أكيد ح تضيع

إلحقها لو شايف وما تلفّش

يا إما تنفّش تريّش

يا إما تاكل مش..

وتعيش مفلس مطيّة لكل صاحب كرّش..

اللى ح يزعل.. ح نسلخ وشّه ونسييه
من بعد ناكل نصيبه..
ياكل فى بعضه - بكيفه..
يا إماً يهمد فى حدود أرضه.. يهشّ ينش..
...

شاطر..؟..
ح تلقى كافّة التساهيل..
كون بورمجى.. فوريجى وأونطجى تحليل
ساعتها ح تكوّش على النسوان
وتبقى شاعر خمس نجمات وصاحب مال
ولك مريدين أرائيه بألف لسان
فرق مساريع..
وألف فرصه تجى لك تخرب الدكان
وتبان كإنك معمرها شطوط ورمال.. بدون تصنيع..
فريد زمانك بديع..

تشيب صحيح لكن تظل رضيع
ولك على كل ناصيه وكل حزب رجال..
مرأت إلى الموت تاخذهم بالنفير للحرب..
ومرة للقتل سلم بحجة التطبيع..
وقرش بقرش!!

...

الدنيا من يومها مسرح
وانت مخ كبير..
لو ما فهمتش.. بكره تفهمها..
الكل كومبارس فى الصالة.. وفى الجامعات
وحرام - إذا كنت خايب زى ما تمثّلش
وتضيع العمر فى البروفات وحفظ الدور
المخرج اللى كتبها عبد المأمور
وما عدش وقت، الوقت بياكلنا..
واقفه العفاريه ورا الكواليس ح تاكلنا..

حافظه وعارفه كافة التفاصيل..

من فكرة المسرحيه لسر تمويلها

وكيفها راح تنتهى

وكان امتى أولها..

مستنظره لحظة الذروة.. ح تقتلنا..

مع الستارة ح تدخل فى رقابنا تحش..!

...

يادويها عدت سنه - محسوبه بالتواريخ

من غير معارك ولا أناشيد

ولا صواريخ -

على يوم دخولنا زرافاتٍ ووحيداناً فى دين الدش

والحج للغردقه سنوى على ودانه

صبح شرعى..

والعمرة صبحت لطاباً أو لشرم الشيخ

والحسنه والمنحه محسوبه بآثر رجعى

وكل وقت بوش..!

المرايات

كل مرايات الخلق كدابه
ما تشوفش نفسك فى مرايات غيرك..
تكبرك مرأت
وتصغر بيك..
براويزها شيش شبابيك - ومن بره..
غيره ومدهونه بدهب مغشوش..
إن قل خيرك -
ح تلعن خاش خطوط سيرك..
تشرب وتغسل رجليها فى بيرك..
وان زاد وفاض الرزق من غيرك..
تطفح همومها الراقده تحت الوشوش
فيه شىء خفى مهما حاولت معاه..

ح يقسمك نصّين..

اتنين..

وكل واحد بذنبك

ينْهش في قلبك وعلى جلدك بميت خربوش..

تطلب رضا..

وأبدأ ما ح تفهمهوش

...

كل مرايات الخلق كدابه..

إلا مراية نفسك - القلابه..

إجلبها بدموعك.. وخبيها

لكن إوعى تنسى انك تبص عليها..

في كل لحظة يوماتي

تبحلق في اللى يظهر فيها..

تتأكد انك مت..

لو اللى شفّته في مرّه ميّزته

وما عرفتوش..!

تحت جرة القلم

غريب في كل الدنيا إلا اكون في مصر..

غريب في مصر..

إلا في حوارى القاهرة..

غريب في قلب القاهرة إلا في شقتى القديمة..

غريب في شقتى القديمه

إلا ف غرفتى..

غريب في غرفتى إلا اماً أكنّ ف ركنها البسيط

ع الكرسي واعفّق القلم..

تهجرنى غريبتى

فى لحظة الكتابه عند برزخ الوجود وقبل حافة العدم

أفزّ.. استنّفز.. استلذّ لسعة الألم

ساعتها باملك نفسى..
أمتلك حريتى
أحس إنى رب غرفتى
ورغبتى قدر برسم كلمتى..
على اللى باقى من فرافيت قدرتى
وبواقى عزم عزتى
القاهرة بجلالة قدرها
بزحامها وبتاريخها أمر إمرتى..
وسلسل الزمن والدنيا حرف تحت طرف.
جرة القلم..

الكون بحاله.. يكن
جوّه قلب قبضتى..

تهجرنى غربتى
تتجسد القصيدة/ غنوتى على الورق

وبِرّه فَرَحْتى

الوليدة..

تخمد فى تلج الصمت جمرتى..

أرجع غريب..

أَتَوْه فى صحرا وحدتى الجديدة..

وابتدى..

من ثانى رحلتى..

كل السكك ندامه فى متاهة غربتى..

واكره القصيدة!

بلسمر

شَعْرَكَ حِرَامِ الصَّوْفِ فِي لَيْلِ الشِّتَا
يَا أُمِّ ابْتِسَامِهِ لِلنَّظَرِ .. مُلْفَتَةً

...

كَانَ فِيهَا إِلَيْهِ لَوْ كُنْتُ قَدُمْتُ
قَوْلِي خَطُوتَيْنِ - سَنَّتَيْنِ وَفَسَّرْتُ
لِيهِ ذُنُوبِي مَعَانِدَانِي .. وَمُغْتَنَّةً ..

...

شَعْرَكَ حِرَامِ الصَّوْفِ وَأَنَا سَهَّيرٌ
بِأَتَمْنِي يَوْمَ أَنْعَسَ غَرِيقُ الْبَيْرِ

..

تَعَبْتُ مِ الْخَوَادِيتِ وَمِ الْمَشَاوِيرِ

أنا السَّمِير اللى لسانه أُسير
لكل مين تخاويه
فى ليلة التَّيّه
تَقاسمه فرحة صغيره تشفع ليه
قصايده لو فى الحزن مُنْتَبّه..

...

شعرك حرام الصوف وانا سقعان
يُلسعنى حدّ الريح فى ليل بارد
لا كنت عنتر أو أبو القمصان
ولا جن من أيام زمان مارِد

..

الصحرا مدّت حضنها البارد
تَعْشُمُه بوعد ويسافى الرمال تخفيه
أنا اللى تَمَرّه من الحلال ترويه..
نخلى طرح فى الحرام
وانا فرحتى ميتة..!

..

ماشى فى دروب العاشقين باتكفى

نجومى تهرب فى الغمام تتخفى

ليل الغرام كفه

وعمرى فى كفه

ضمينى قبل الوعد ما يرمينى..

حلى ضفايرك م الخجل ودارينى..

طار الحجل..

ما أنش لسه الأوان

قبل الأجل.. عندى الأمل تاخدينى..

لشطوط عيونك أستريح واتدفى

وأدق خيمتى ف أرض.. متثبته..!

....

شعرك حرام الصوف.. وانا المتزمل

خايف وقلقان وبكره جبان..

ومتعجل..

شاهر سيوف الخوف ويأجل..
ساعة خلاص الروح/ عدمنى الشوف
فدثرينى واعملى المعروف
لمسة ايديكى بلسم المجروح..
وحنان عينيكى
لسان نيران البوح..
يرد لون الروح..
لوردتى الباهتة..
يا ام ابتسامه للنظر ملفته..
شعرك سلاسل شمس.. عزّ الشتاء..!

آخر الانفاخر

الأم..

اللى وهبت للدنيا القانيه

تلاتين بنت وواد قالت - صبيان عقاريت

وينات بناتيت وصبايا..

للمدرسه.. للجامعه.. للثورة وللبيت..!

حواديت وحكايا انكبت فى مجلات الحيط

وف دواوين أحلام ومكاتب أمن..

ولما حبت من قلبها فرحت علناً.. قالت..

واما شافت بعنيها وعرفت عاشت على قدها

بالطول والعرض وشابت

وايديها التعبانه بتدق ابواب المستقبل

وتحت آهات كراييج العسكر والغربه

وعلى منصات الحرّيه.. أمثالها وغناويها انتقلت..

الأم..

اللى كانت فى صباها قمر اربعتاشر..
واللى طرح حنانها وفرح شقاها نور عتبات ياما
وبدل ياما خرايط..

أفسح على قد الدنيا ما ضاقت ابواب للرزق
وشبابيك للعشق ونور فى عقول وقلوب
صبيان وبنات

ملا كراريسهم بقصايد وسنايل قمح وهتافات
ودموع للحزن الصامت..

الأم..

اللى اولادها وهيَّه العاجزه فى مكانها
لفوا العالم - بجناحها

وف أحضانها على جناح الحدوته

كل بلاد الله يا خلق الله أوطانها

انتشيقوا فى الغربه حنانها

عاشوا زمانها

زنازين وسجون وتاريخ مش باهت..

فى شوارع تشغى بمظاهرات الشوق الـ - مش ساكت
بتهز حوارى الليل الصامت..
الى نجومه عن الفجر المتأجل.. تاهت..

الأم..
الى غنت طفله لراية مصر المخروسة..
(من يأخذ بيدى يهدينى النصر..) أما اشتاقت
حتى وهيه عروسه
مارميتش عن اكتافها حمول الناس - شالت
قالت فى ايام العوزه - لا بأس وصامت..!

الأم..
الى اتنشقت المزيكه ف خشب الساقيه
والزجل الأجل بالفكره الراقيه
واختارت م الدنيا الحته الباقيه -
عز الفول النابت..
لمة لاولاد
رهافة احساس الناس بالناس..

الغنى إنك تستغنى..
والخير ان كان ح يكون فيه خير
يفضل فى الناس.. أصل وثابت..

الأم..
اللى صبحت دنياها الواسعه الواسعه بقدر سرير
وما بين أربع جدران،
الريح صارت بتتشف شجرتها
بين أحلام مطفئ
وفجر ضير..
واللى خفت على طرف لسانها غنوتها.. ودابت
.... هيه ذات نفس الأم..
اللى أول ما سمعت آخر عنقود أولادها..
بيدندن أول حرف ف أول كراس حكايتها..
شهقت... نفسها تتنفس من نفسه بواقى
آخر أنفاسها..
وابتسمت أول آخر مره.. وماتت!!

البنات

البنات..

الى انا وقلبي سوياً حيناً هم..

فى حوارى شبابنا

والزمن المغنى

ليه على حساب عمر سنى كان رضاهم..

الى برضايا خدوه أو غصب عنى..

قلبي جامل سنهم ياما وحباهم..

وافترض نفسه على دنيا بتتكلم لغاهم..

وحفظنا رغم احتمالات الغرض والسن

أحلى ما ف غناهم..

إحنا عجزنا.. أنا وقلبي عجزنا

قول على رأى المثل م الحب دويانا..

شبينا لكنّا.. ما عينا..
لأننا مازلنا شايفينهم.. كما هم
كاملين الوصف
فى تمة بهاهم - البنات - زى ما كانوا
فى يوم أول لقاهم
يخطفوا القلب الخفيف القلب منى..
فى ثوانى أفرح كإنى لسه فى سنّى وأغنى..
فجأه تبقى الغلطة كنى ف مالطه بادّن
وأهانى..
يهربوا من شمس أرضى الواضحه جداً..
للغمام اللى مغيم ذكرياتى
التايهه عنى ف ليل سماهم..
أرجع احزان..
واحتمى بأمان سكاتى.

نسيان..

شئ عادى ينسى الناس الشاعر..
زى ما ينسوا الوالد والأم
وأستاذ المدرسة والتاظر
وأصحاب القهوة والتاجر بعد ما ييموت..
الخلق بيلهيها الأيام دى عن الواجب -
وعن المزيكه والألوان والفرحه والأحزان - همّ
العيش وصريخ القوت..
وساعات بتشوف العالم والكون
أصفر من لقمة عصفوره..
وقد تابوت..
...
عادى..

أسهل شئ فى الدنيا ويمكن أجمل شئ النسيان

نسيان الانسان للحزن
والفرحه أول ما تفوت..
وتضيع فى زحام السوق أو فى غيام الملكوت..
لكن اللي مش عادى..
وغير إنسانى ومُعَادى..
إنه بيحصل وح يحصل إن الناس فى الزمن الجاىّ
حَ تنسى الشاعر..
وهو لسه ما كملش الغنوة.. وحىّ!

الموت

إمبارح..

غنيت بعض الأشعار الموتى..

لبعض الموتى

عن الناس الموتى

والزمن الميت

اتعجبوا منى اكمنى كنت باغنى للموت

بكل جنون الإحساس الحى

وبالكلمهم عن زمن الضى الجائى..

أعجبوا من قدرة قلمى الميت ع الصدق

لأنى كدبت عليهم

حين قلت إنى رفضت أموت..

وانا ميت..

خَيْلَ لِيهِمْ أَن أَنَا بَاتِنَفْسٍ
وَأَنطِقُ
بِأَضْحَكِ وَأَتَأَلَّمُ..
وَدَانَهُمْ سَمِعَتْنِي بِكُلِّ وَضُوحٍ بِأَتَكَلَّمُ
وَبِأَكْدِ إِنَّ الدُّنْيَا مَشْ حَ تَسْلَمُ بِسَهُولَةٍ..
وَحَ تَرْفُضُ زَيْيَ / تَمُوتُ..
مَعَ إِنَّا كُنَّا جَمِيعًا
فِي عِزِّ تَمَامِ الْإِسْتِمْتَاعِ.. بِأَلَمُوتِ!.

ما في .. حكا..

لسه النهار
والليل كتم بالضلمة نفس القاهرة..
بعتز على الرصفان
بواقى الذاكره..
الميته من كام سنين فى الزحمة هرباً
من جنون حزن الهموم
العابرة..
ماشى أرك على اللى فاتنى من الفرح..
أسند على ضل الحيطان
الى عليها نبش أيام الطفولة
وأغنيات عشق المراهقة وذكريات

السجن والرحلة إلى كتاب القرى..
فجأه.. التقيت حارتنا سد
وشفت بيتنا مفتّحه فيه الجراح..
وبواقى من ضىّ الصباح
فوق العتب متبعثره
قلبي نبض فرحان.. ومدّ
فذهت لك.. ما حد رد..!

جيوب فاضيين

تصبح على خير يا شاويش
يا مروح بيتك يوميا .. بمافيش
غير الشحته والبقاشيش
من إيداللي بيسوى فتضرب له سلام
أو من جيب اللى ما يسواش من أيتام
أو حرافيش..!

...

الليلة الموسم.. وانت بخير وسط حبايبك..
عيد الشرطه.. ومش ح تنام..
طيب ليه شايفك مش فرحان من قلبك..
خطبوا البشوات واتكلموا عن طالع سعدك..
اتفرجوا على طوابير استعراض مجدك..
رقصت لك (فيفى) وغنت لك (فاطمة) وعبد العال..

انتغزلوا فى العايق ابو شريطه..
وأمين الشرطة الرايق ابو برنيطة..
على حسك عملوك هيصه هلمه كبيره وزيطه..
وياسمك لموا النقطه من العمال..
والفرده من كل رجال الأعمال..
نصبوك أقواس نصر من الاسماعيليه
لكفر احمد عبده لعابدين..
زعلان ليه..
وده كلّه عشانك
يا عديم اخوالك/ مالك؟!
إيه يعنى صلبوك م الفجر على الرصفان
من أجل أمان التشريفه
فى عز البرد ومزنوق نفسك تتدارى ورا حيطه!
إتحمل حبّه ما ابنت طول عمرك زهقان طهقان
فكر فى مجد الأوطان

ساعتها ح تنسى رجوعك عدمان العافيه لعيالك..
بايدىن ورا وايدىن قدام..
روحك م الهده خفيفه شريفه..
وجيوبك ما فيهاش تعريفه.
ولا باكو دخان!.

خيانات مشروعة

العشق قصده ينتقم مني
بيصحح الذكريات حسرة تجنني

..

شباك مدندش فقير الحال بلا ستارة
بنيّه فلقه قمر في أول الحارة..
جاره تبيع الفواكه ألف صنف ولون
بنوته خالي النوى مجنونة وسمارة
عسل ولون..

عيون عذارى بدون الكحل قدّارة
ضحكة رنين الخلاخل فضّه دقّ الهون
لياالي مقاصيص ضفاير..
كحل خرّمس موت
يحلم المشنقة..

دهب عصارى مغارب
أويّه متبّشّنه
شعر الصبايا وتوت
على مؤرّده فى قارب
أساطير من الجن خطفتنى ولسّه بنوت
صباحات ضيا الشمس فى تباسيم من اللولى..
بساتين دفا فى الشتا للغربه ندهوا لى..
تناسيم طراوة أماسى فى سواقى الصيف
براح مسافات مدى طارح مدينه وريف..
رغيف من القمح صابح فى ساعات الجوع..
ورد فُ جناين يوزّ النَّفس علي حالى..
طرّح حرير تُلّ تخفى أقل م اللى بيان
شيلان وألوان تتوهنى عن اخوالى..
جميّز، سالام، سطوح
للبح تسهرنى..
تبرق خيال وتروح تفكرنى.. تكدرنى..
تفوتنى فى غربتى حزنى يحررّنى..
أرجع على حجر أمى احبى واشكى لها

أَتَدُلُّ

تَأْمُرْنِي..

تَلْفُقُ شُرُوحَ الْفُؤَادِ

أَلْقُفْ وَتَعَذِّرْنِي..

تُرْمُ قَلْبِي إِلَى كُلِّ خَرِيشَاتٍ وَجُرُوحٍ..

مَنْبِيْن أَرْوَحُ تَلْحَقُكَ

تَخْطِفُ حَبَابِي الرُّوحِ..

تَغْسِلُنِي تَحْتَ الْمَطَرِ.. أَبُوحُ أَيَا أَبُوحِ

مَالِيْشَ فِي دَاءِ الْهَرَبِ

أُرَاقِقُ الْجِنِّ وَاتِمَادِي

أُغْنِي وَأَبُوحُ..

أُنْزِفُ حُرُوفَ عِ الْوَرَقِ

دَمْعٌ وَعَرَقٌ.. أَوْ دَمٌ..

...

عَلِشَانِ كَدِهِ.. لَسَهُ قَلْبُكَ بِالْحَيَاةِ مُهْتَمٌ..؟

طَظْ فِ أَبُو الْمَوْتِ

سَوَا فَاتٍ وَكُلِّ مَنْى أَوْ لَسَهُ فِي غَدْرِ يَفُوتِ

كُنْ مُلْتَزِمٌ بِالْهَوَى

لسّاك صبي وعاشق

مدبوح..

وسهم الحياه جوّه الضلوع راشق

يتيم.. عديم الخلف

جضّ السلف مني..

ولحد آخر نفس مجنون..

ح اخون سنّي!

وطن

العشق محتمل..
والكره أكثر منه احتمال..
وانا ياللى نغبش فى قلبى هاتف الجمال
كشفت لى سر الريشه والقلم
من يوم بلانى القُبْح بالألم..
والموت بشوق الروح للإكتمال
بكف إيدى خلقت زهرتى من العدم
بحكم شهوة عشقى للمحال
وشعري للوصال..
كسرت قيدي وما آمنت للندم..
جاهدت ضعفى كثير
قتلت رغبتي وحلفت ما أخسر كُش
كتمت خيرتي فى غياهب الضمير

عاهدت نفسي ما أسألكش
عن شر هذا المستحيل الهردبكش
اللى بيبلع فى رماله أجمل العيال..
وبرغم رعب حرمانية السؤال
وتوهة غربتي فى أرضك اللى ضاعت
فى حرامك الحلال..
لسه باطهر نفسي من مزاللق رغبتي
وياطفى حرقتي
بدمعة أمتى الزلال..
واتسنى إن تدوم عليه نعمة - الرضا
واكمل اللى باقى من بواقى خطوتى
.. وما اكرهكش!..

نخاريق

ضاق البراح..
هَيَّجَ جنون الطير..
ولبست العصافير ريشات الرِّخ
قالت دجاجة نطلع النخله
نزرع بذور المخ في العالى..
أبو الفصاد اللي عكّر ياما موألى
جه على باله فجأه أن يستعدّ
ويشد الزناد ويطخ
قعد الخدارى فى عش الصقر يتمتأ
جبل الغراب واتجعص ع العريش واترستأ
البطة طلعت ع السطوح تدن..
الديك رهن عُرْفه سُحِتَ وغيّه فى النسوان
الرومى من غلبه بايت يلم القش للوزّه

البومه خرجت تبكى اولادها..
جنازه جارّه
والمطر بيرُخ
اشمعننى يعنى انت عامل فرُخ بتغنّى
راضى بمصير البلبل الفنان
اللى انخرس لما شاف نسر الفضاء (بيش..
فراح ياكل عيش ولحمه رحمه ع السلطان
فى موائد الرحمن
وساعة فراغه يغازل بنت ابو القردان..
اللى مجمعز على العتب الملوكي يجخ
يحكى حكايات للحمام..
اللى انهطل لجُل السلام وارتاح
ما دام اليمام -
لقاها فرصة نتف ريشه وعمله اقلام..
يكتب ويفتى يهطرس بالكلام ويبخ
ويكل حريه راضى يكسروا جناحه..
من أجل أن يكرموه..
قبلن يموت بنيشان..

فعب

العمر: يبقاوح مع طفولته
يا هلتري..
عينك على الورد اللي دببته
والا على قمر الليالي السود..
اتسرسبت أحلامنا ع الإرصفة..
بعد المظاهرات عفيه وجناحات الطير
وصهيل جموح الخيل وغض العود
زحفنا تلحس مرع الإرغفه
عجزنا نلقى لأمهاتنا الشفا
باب الخيال مسدود
وبراح قلوب العاجزين محدود..
كل اللي سرسب م الإيدين
وكان نبيل ما يعود..

شجرك يبيس م الغلّ ومعجّر
وحلمت به منبت
فى غير أوانه اخضر جميل لاوصاف..
عجرت عن وصفه..
كفك على كفّه لافلتان ولا متبت
لكين.. خوآف..
مهموم بتهرب م القمر وتخاف..
بحترت روحك شك فى الصفصاف..
خاصمت أبوك..
على ذمته/ ضعفه
وحكمته لما التزم صفّه
رضى بحدود الجودة بالموجود
على قدّه ويأ الوطن قسّم الرغيف الحاف..
والنيل حواليه بيشغى للحلوق بالدود
وكل من يعرفه طيب فلت حدّه..
خرج للسوق
يبيع هدم عزّته ويتوه عن وقته
كنت العشم يا فتى

وفردت لك صدرى..
عجّزت ليه بدرى
وهجرت ابوك لما برك مهود
نخ الجمل
من غير خجل سيّته
لا رحمته من نفسه
وفطمته نورته بسبب خبيته
ولا يأس أنقذته
ووهبت له عمر تانى جديد..
وقتلته..!

رسم عيال على حيطان ميّنه

صور العيال ع الحيطه ح تجنّنى
إيه اللى كان فى إيديه.. ما عملتوش
علشان حفيدتى تشوفنى..
فتخاف منى
وابنى يزق فىّ ويقولنى اللى ما قلتوش..
يا هلترى.. كان أبويا
يوم ما أنكرته..
وكانت بلدنا (السوق وسيدى مجاهد
والتل وجنينة يا سين ومديحه..
وانا ابن خالة البنت رسميه واختى آمال!)
والا أنا مش هو..

ولا ع البال..
إيه اللي فاضل م اللي كان وانا بعته..
ما فاضلش فى ايديه سوى النسيان..
فيا إما أشعل شمعة الموتى..
واكن جنب الحيط واتحول..
نينجا ربوت أو كف متنسول..
الفالح اللي انتصف بيعيشها م الأول..
على قد ما تضحك له يدعى لك..
وقد ما تدى له يدعى عليك..
وفى قفاك ع الشعر يتناؤز
قَرَحان باسمك على لسان التلامذه..
ويخدعك بالدنيا لسه زمان..
فى خدمة الممالك ح تتجوز
من ست عاقلة وانت طبعا عاقل..
ح تكفى خيرك بشرك لسه ح تناضل
ياما كان فى نفسك بنت مجنونه..

تنط في الأتوبيس وهوّ يجرى..

من غير ما تسأل هوّ رايع فين..

غير انه رايع في اتجاه النيل!

...

ليه يا عجوز الذنب كلّ عليك

سييت اللي ضربك على إيدك بيتقمز

وطمعان فيك

ما قصرتش

والسوق ملان أقنعه من كل مله ولون

ليه انت ما اخترتش

هدوم على قد ما تبغى وما بتريد

م الباله كل المنطقه حرّه..

واللى ما ينقص يزيد

الأرض خلفت كافة المواعيد..

ما عدش ليلك غير إن تحكم نفسك..

وتقع الباقيين فيرضوا عليك..

بجبتك زى ما انت

بعيشتك المرّة..

أدى انت بعد ألف والدوران حكمت

من برّة..

القاضى كنت - وكنت جلدك..

بأيديك عطيت الإذن لاولادك

بإرادتك الحرّة..

يحطواسكّينتك علي رقبتك..

ويقطعوا وهمّه بيضحكوا

رايتك..

..

فموت قى جلدك.. وحيد!

عكاز من شعر العشاق

عائش باتعكز على شعري..
بأزك وآتسند ع الباقي من أحلام عمري
بادور جوايا ع اللي بيدى للعود الناشف خضره..
للعاجز قدره..
للمجنون الحكمة والعبره.. ما لاقيش
ما عدتش قد مشاعري..
الحب اللي ف قلبي ما عدش يلبي
احتياجات العالم والناس وبلادى..
والقرش اللي ف كفى
ما عدش مكفى أولادى
وما فيش..

* *

أنا مين؟

عمرى ما كنت إلّايا - إنسان عادى..

حاول يدّى للصدق مبرّر

للفرحه أيادى

للكتاكت ريش

رسمت على ابواب السجن من الداخل..

عرايس بحر وعصافير..

زرعت ف رمل المحاريق القفر بسلة وجرجير

وحلمت - اللهم اجعله خير - ببلاد أشبه ما تكون

مصر - لكين حرّة..

مش متحكّم فيها الغير

بتربى أولادها بحنية (أم سمير)

على حاف وحلال العيش..

....

داب الملح المتحجّر فى المية..

الشهد اللى مكرّر.. مرّر..

عكّر ديب الحدوتة على الماء..

ومضغ قطع على مهله حبال صبرى..

خالنى اتحيرت فى أمرى..
خلط الأسماء
فاجئنى ف آخر عمرى
بأن الصدق كنوب
والحب اللى أنا عشته ما كانش معشش
فى أى قلوب..

من صغرى لوحدى
حواليه الناس أمنيّة وأنا باقرا لوحدى..
تحت جدار الدوار أهلى بتتشمس
وانا فوق كتف الجن الرّحال
دون كيشوت الجوال
لجبال الهمالايا وغابات سيبيريا وشطوط
الجزر الوحشية - خيال..
ولوحدى..

فى السوق وحدى..
فى مظاهرات الجامعة ووزانة سته وتلاتين
الدور التانى فى سجن المنصورة - لوحدى..

فى الصحرا المحاريق وحدى..
زى القط البراوى المقطوع من شجرة لوحدى..
ألم حروف الشعر
الحرف على الحرف
ألصم أشلاء فى أشلاء
أتصور بعض الأشياء الوهميَّة فى الأشياء
وأعيشها لوحدى
أرسم حارة من حلم طفولتى فى خيالى..
أقابل فيها مخاليق جُم على بالى..
وبنات عشاق..
أبكى فى أحضانهم سوء أحوالى
واسألهم وانا باتعكز على شعري
فيجاوبونى بكل بساطة
ويردوا سؤالى بسؤال..
(الدنيا اللى تعيش على وهم اللقا
أجمل منها فراق..
طب ليه؟
ليه بعد العمر اللى بيشغى

ناس وقصايد

وحكاوى بنات وعيال

واصحاب ياما واعمام واخوال

واخوات وغناوى أطفال

ليه راضى تسييه وتموت وحدك

قبل ما يخضّر يزهر

وبإيدك..

على قبرك.

شجر الموال..!

مسافات الطير..

الشمس مش عايزه تطلع ليه فى مواعيدها
ولا القمر
عاد له نفس يفضض الميه..
شبورة حط الغيم وقدّدها..
ليل ضلمه خرّمس همومه خيه وعقدها..
نهار صباحه غشيم مرهون بعوايدها..
ما فهمش وعد المسا.. بصباح يجدها..
(ايه اللي حرم الفرخة من بيضها
وسلطن الكتكوت على الحيه؟.. وقنّدها..
غرس صوابه فى عيون الوقت حتى عماه..
ده فجر نور..
والا ضىّ خيال على ميه؟..
ودى صبايا.. وقصايد والا غاب فى الريح؟!

قال اللى سمعوا بشارة المجاريح
الفرحه كانت بترجع فى مواعيدها
يهل يوم عيدها حتى ف ليل معاندها..
مادام ح نقدر نفك الحبل من إيدها..
وندلّها مرّه واحده وللأبد ع الشمس..
العدل مش منجه تطيب فى بشنس
أو تندفن فى الرمل لجل تطيب..
ولا هورهن بمواسم البوح.. أو النسيان
ولا سيرة الحب صعبيه لو تلاقى لسان
حسن ما طالش عمره نعيمه
ولا ياسين غزل الكلام لبهيّه..
العدل زى الوطن
زى الفرّح.. حريّه..
عمر الطيور الطليقة حلمها المسافات..
ترف ع الميه نسمة حب وتغرّد..
النهر يصحى
والشجر يهتز شوق ويزغرد..

لو أجبروها تموت
م القهر قبل العطش..
كمثل ما كانت فى بدء الكون..
أيام ما كان الغيم وكان ظلمات
حتى ف سكون السجون..
وفى الهجيع الموات.. تحلم بضى القمر..
متأكد ان بكره أكيد ح تطلع شمس
مأمنه بالريح عفى قادر يزيح الغمام
عن سر عجز المتعب الإنسان..
اللى رمت به الهزيمة
فى شباك الأمس..
ومحطة من الحبس
يحكم ومن تانى ع الألحان وع الألوان
يفك أسر الطيور
يطلق لسان الشجر
تتحقق الأوطان!

إياك..

سَلِّمْ قلبك لكِلابِ الحزن
ولا تخافش
الحزن جميل ونبيل ووفى..
حتى ف أوطى حالاته السريه..
لما بتكتم على نفس المجروح المكسور
آهات الهمس..
لكن إياك..
إياك.. من ديب اليأس..
اليأس عويل وقليل الأصل عفى..
لو يستفرد بممالك قلبك
ياخذك من نفسك قفش ولا عسكري
مفتري.. ح يشل إيديك..
يخضّر شجر الهم الناشف على رمش عينيك

ينهش جسد الكلمات
اللى بتتشاقى أطفال فى جناين أشواق النفس
إياك من ديب اليأس..
اتحصن منه بحواديت العشاق
- وان ماتوا...
وبأحلام الحب - وحكاياته
حتى لو صارت كلماته مجرد نكرى..
مرّة..
على لسان الأمس

معلمش يا.. زهرا!

مازلت باحلم بالخيال العبيط
كما أى زعفة نخل
فى أى غيط
تفرح مع الصبح الجديد بالشمس
وأُتخمد بالليل كأنى بكيت

أمشى الشوارع هيه نفس البيوت
ديكورات فى فيلم سخيّف
مالهش سيناريو..
إخراج عجوز مُقرّف عديم الهويّة
مازال مصرٌ يئُص فى الكاميرا

مع إنها خُرْدَة بلا عدسات..
ويُسبِّبُ يشخَطُ فجأةً في الكومبارس
ويهبُّ رايح جاي كأنه بفكَّر
ويروح ينام في شقة الرقاصة..

مافيش بطل
ولا هيَّه قصة حب
لكن شريط باهت عديم الخيوط..

إيه يا فتى قشَّف جموح القَريحَه
نشَّف حنين الورد للملكوت
واستبدل الشَّعر بورق بنكنوت
وقضيَّة الحرية بفضيحة؟

كان في بلدنا زمان معلَّم أمَرَّتِي
يرقد على الطاولة النهار والليل..

وكلّ من كان يلعبه يقلّعه هدمه
حتى العيال اللي كانت برّة متعلّمة
واللي بتقرا الجرايد
وفاهمة فى التكتيك ولاستراتيجي!
زىّ اللي بيحبّوا كان قادر يجرسهم
ياخد فلوسهم
ويكسر حاجه فى نفوسهم..
وما كانش صاحب القهوة بيحاسبه
أتاريه مشاركه فى دمنّا بالنص
ما كانتش قصة طاولة
ولا كوتشينه..
كانت حكاية شعب ملهى فى غلبه
مش عارف الدوسه من الشيش بيش
ملهى على عينه
وهمه يعيش
واللي يبيتّ بيه بيصبح فيه

وفاكر إن السياسة حظوظ

ورمّية زهر!!

عكّرت ليه يا حظ ماء النهر

وأخذتني للسوق على مُشمّى

دانا راوى رملة سينا من دميّ

وعضميّ لسه في حيط كتير م المصانع..

كراييج عساكر السلّطه فوق ضهريّ..

وسعد باشا صوتّه في ودانيّ..

يمكن ساحر لى الواد أبو لبّانه؟!

أفضل ألت الماضي وابكى عليه..

وهُمّه يستفردوا بلولاد..

وبالقوا شيط..

ويرضه اسقّف في نهاية الفيلم

المنتج العبقري يتجوز الرقاصه..
يرمينى حلق الضلّمه للإرصفه..
ألم باقى لأرغفه من الزياله..
واختار بكل قلاطه قمصانى من البالة..
واتمادى فى حبى لأرض الوطن..
وانا عارف ان الفيلم متزيف
واللى ابتدا القصة لعب غيرها..
البطلة هربت ليلة التصوير..
ويّا صبى الكوافير
ومازلت باحلم بالخيال العبيط.. متكيف..
أفرح مع الصبح الجديد بالشمس
واتخمد بالليل كإنى بكيت.. ومتقرّيف..
لجل اتغلّبت المرّة بعد الألف فى الطاولة..
مع إن صاحبى الأمرتى
مات بقى له سنين!!

مناويع فصايد الديوان

- 7 * طير مغنى عجوز
- 9 * زمن للموت
- 11 * حرب أهلية
- 13 * على قرن التور
- 15 * شيزوفرينيا
- 19 * كومبارس
- 27 * المراتبات
- 29 * تحت جرة القلم
- 33 * بلسم
- 37 * لآخر الأنفاس
- 41 * البنات
- 43 * نسيان
- 45 * الموت
- 47 * ما فى حدا

-
- 49 * جيوب فاضيين
- 53 * خيانات مشروعة
- 57 * وطن
- 59 * تخاريف
- 61 * تعب
- 65 * رسوم عيال على حيطان ميتة
- 69 * عكاز من شعر العشاق
- 75 * مسافات الطير
- 79 * إياك
- 81 * معلّش يا زهر!!

صدر للشاعر

١- دفاتر العامية المصرية:

١- رؤيا الحر الفقير لله النكدى الكفران ابن عبد الباقي ليلة
موت الطوانى اللى بنى مصر.

٢- شكاوى الفلاح الغشيم عن التمثال المحطم للزعيم
السليم.

٣- رباعيات ابن عبد الباقي

٤- كتاب الأراجوزات المصرية (شبه رسميه - شبه شعبيه) ..

٥ - مواجع مصر.. على هوامش دفتر جبرتي العصر.

٦- شكشكة على سبيل الفذلكة.

٧- (ألف لام - لام ألف) تعاريف من باب التخاريف.

٢- دواوين شعرية

* أغنيات للإيدين السمرا (مجلس الإعلام الريفى)

* كلام من القلب (دار الكاتب العربى - القاهرة)

-
- * غنوة لمصر (مجلس الإعلام الريفي)
- * أناشيد الحزن اللبنانية (دار الفارابي - بيروت)
- * قصائد تحت القصف (دار الثقافة الجديدة - القاهرة)
- * فرحة ليست للحبر السرى (ط١/دار ابن خلدون - بيروت)
- ط٢/ القاهرة
- * الطمى واحد والشجر ألوان مطبعة الأمل - القاهرة
- * أحزان زمان الفراق مطبعة الأمل - القاهرة
- * فى حب مصر ط١ دار الثقافة الجديدة/ القاهرة
- ط٢ دار الفارابي - بيروت
- (ويتضمن ديوان (شطوط الحلم والحواديت ونص العرض المسرحى - فى حب مصر).
- * ورده على خد موسكو مطبعة الأمل - القاهرة
- * قصائد العشق والغربة (الهيئة العامة للكتاب)
- * يوميات مدينة مكسورة الجناح دار الحسام - القاهرة

٣- مجموعة كتاب الشعر

كتاب الشعر الأول..

ويضم مجموعات:

* أراجيز العواجز

* أراجيز الأراجوز

* كلام بسيط فى السياسة

* كلام حزين فى الفن

* مختارات من جنينة الأطفال

* واحد أخذ من المحيط للأبد (قصيدة درامية طويلة)

* بيروسترويكا بالعامية

* فتافيت الناس والأيام

* رد الفعل

* مواويل البال الطويل

دراسة/ إبراهيم فتحى

كتاب الشعر الثاني

ويضم مجموعات:

* أحزان الجميز الباط

* قشة فى ملكوت

* سلف ودين

* رزق الهبل

* على قد إسمى

* طوبه فى المعطوية

* من مية المحايا لية العفاريت

ودراسات لكل من:

* جميل حتمل

* أحمد زرزور

* أشرف أبو جليل

* د. سيد البحراوى

* سيد خميس

* مسعود شومان

* د. يسرى العزب

٤- قصائد درامية طويلة (للمسرح)؛

* كانت وعاشت مصر

* غنوة للحرب.. غنوة للسلام..

* النشيد الفقير / عن بابلونيرودا..

* نشيد الأناشيد المصرى

* الأوله الآخره فى غرام القاهرة..

٥- قصائد منفردة (ماستر) - فصيح؛

* أحزان ناصرية من عام الردة

* رسائل إلى ليلى العامرية

٦- أشعار بالفصحى

* قصائد غير شخصية (دار الهمداني - عدن)

(تحت الطبع) - مجموعات

* رحيل المدن

* أحزان ناصرية..

٧- مجموعات شعرية للأطفال

- * شقاوة - الهيئة العامة للكتاب
- * فى الغابة الجنية - الهيئة العامة للكتاب
- * حواديت وتلامذة - الهيئة العامة للكتاب
- * شبح فى عرين الأسد - دار الهلال
- * الثعلب حارس الدجاج - دار الهلال
- * شجرة الحروف - كتاب علاء الدين/ الأهرام

تحت الطبع

* قلوب من شجر الجميز (عامية)

* آخر حدود الزجل (عامية)

* شغل نسوان (عامية)

* قلّة مقامات (عامية)

* متر الوطن بكام؟ (عامية)


للأطفال

* قمر مكسور

* أحلام الأراجوز العجوز

* فوازير عم سمير

جميع الحقوق محفوظة - الطبعة الأولى - ١٤٢٥ هـ



شركة الأمل للطباعة والنشر
٣٩٠٤٠٩٦:٧

كل يوم الصبح ح اكتب لك قصيدة
مش أكيد ح تكون جديدة
كل أحزاني وأحزانك.. قديمة..
كل أحلامنا البعيدة
لسته مازالت بعيدة

